

Nuna tamakkerlugu kulturikkut kingornussarsiat suussusiinik aalajangersaasussanik UPA2019-mut suleqatigiissitaliornissaannik kulturikkullu kingornussarsiat kingusinnerpaamik 2021-mi saqqummiutassatut Naalackersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Mimi Karlsen, Inuit Ataqtigiit)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalackersuisoq)

Siullermeerneqarnera

Inatsisartunut Ilaasortaq Mimi Karlsen, Inuit Ataqtigiit, nuna tamakkerlugu kulturikkut kingornussarsiat suussusiinik aalajangersaasussanik UPA2019-imut marlunnik suleqatigiissitaliornissaannik Naalackersuisut peqquneqarnissaat pillugu Inatsisartut aalajangiiffigisassaattut aamma kingusinnerpaamik ukioq 2021 tamanut saqqummiunneqartussamik siunnersuuteqarsimaneranut Naalackersuisut qutsavigaat.

Inatsisartunut ilaasortaasimasup Kelly Berthelsen, Inuit Ataqtigiit, ukioq kingulleq Inatsisartut suleriaasiat naapertorlugu inuiaqtigiit kalaallit piorsarsimassutsikkut ilisarnaatai pillugit § 37 naapertorlugu apeqqutaanut nr. 2017-249-imut akissutigineqartoq Naalackersuisut innersuuppaat.

Tassunga atatillugu Danmarkimi Kultureqarnermut ministerip 2004-imi atulersitaatut ittumik Kalaallit Nunaanni kulturikkut kingornussarsiat pillugit malitassatut aaqqissuussamik soqanngitsoq ilaatigut oqaatigineqarpoq. Taamaattorli piffissap ingerlanerani piorsarsimassutsimut tunngasunik suliffeqarfiit pilersinneqarsimapput soorlu makkua Nunatta Katersugaasivia Allagaateqarfialu, Kalaallisuuliornermik Ilinniartunik, Nunatta Atuagaateqarfia aamma Nunatta Isiginnaartitsisarfia, kalaallit kulturiala nalinginnaasumik siuarsarnissaanut inatsisitigut pisussaaffiusumik pisussaaffeqarput, malittarisassat naapertorlugit suliassatik kivissinnaaniassamatigit aningaasanut inatsisikkut aningaasanik immikkoortitsisoqartarpoq. Eqqumiitsuliornermik sammiviit assigiinngitsut iluanni eqqumiitsuliornermut kulturikkullu peqatigiiffeqarpoq, kalaallit eqqumiitsuliaat kulturikkullu oqaluttuassartaat pillugit tamarmik ilisimasaqarput.

Katersugaasiveqarneq pillugu Inatsisartut inatsisaat nr. 8, 3. juni 2015-imeersoq naapertorlugu Kalaallit Nunaata piorsarsimassutsikkut kingornussaasa tigussaasut tigussaannngitsullu qulakkeernissaat katersugaasiveqarnerup siunertaraa. Katersugaasiveqarfik nunap piorsarsimassutsikkut kingornussaannik nalunaarsuissaaq, katersissaaq, toqqortarinissaaq, ilisimatusarnermik ingerlatsissaaq aamma ingerlatitseqqittassaaq tamanullu takusassiissaaq. Nunatta Katersugaasiviata Allagaateqarfialu itsarnisat ilisimaneqartut Inatsisartut inatsisaanni ilaatinneqartut tamaasa, matumani aamma nunatsinni eriagisassat pinngortitameersut, nunatsinni eriagisassat itsarnisat pigisallu immikkut ittumik

soqutiginaateqartut nalilerneqartut nalunaarsussavai. Kattuffiit aamma inuiaqatigiit, inuit ataatsimoortut kattuffiillu attuumassuteqartut peqataatillugit piorsarsimassutsikkut kingornussat tigussaangitsut immikkoortut assigiinngitsut Kalaallit Nunaanniittut suussusersissavaat nassuiarlugillu, tassungalu nalunaarsuineq ingerlaavartumik suliaqassallutik nutarterissallutillu.

Siunnersuuteqartup marlunnik suleqatigiissitaliortoqassasoq, suleqatigiissitalu allattoqarfeqarnikkut ikiorneqassasut siunnersuutigaa. Suliamut tassunga atatillugu aningaasartuutit siunnersuuteqartoq malillugu katillugit 1 mio. koruunit sinnerlugit annertussuseqarnissai tagginneqarput. Kulturikkut kingornussat qulakkeernissaannut suliassamut tassunga inatsisitigut pisussaaffeqarlutik isumaginnittunik suliffeqarfiuteqareeratta aningaasat taama amerlatigisut atornissaat isumatusaarnerunngitsoq Naalakkersuisut isumaqarput.

Tassunga atatillugu aamma saniatigut oqaatigineqassaaq, siunnersuutip kingunerisasaanik naatsorsuinermi, siunissami aningaasartuutaajumaartut naatsorsorneqanngimmata. Taamaalilluni piorsarsimassutsikkut immikkut eqqaamasassatut naleqartitat kiap nutartissanerai aserfallatsaaliussaneraalu takuneqarsinnaanngilaq, Naalakkersuisulli takorloorsinnaavaat, tamanna aningaasartuutini amerlanerusunik pisariaqartitsissasoq.

Taamaattumik Naalakkersuisut isumaqarput, piffissami matumani suleqatigiissitat siunnersuutigineqartut pisariaqartinneqanngitsut, taamaatut oqaaseqarluta siunnersuut itigartinneqassasoq inassutigivarput.

